

Aalisarneq pillugu Inatsisartut inatsisaata allanngortinneqarnera pillugu Inatsisartut inatsisaat (Akiliutininik akiliisarneq pillugu aalajangersakkanik allanngortitsineq kiisalu akiliutininik akiliinngitsoornermi kingusinaartumilluunniit akiliinermi ernianut akiliuteqartarneq pillugu aalajangersakkamik atortuulersitsineq)

§ 1

Aalisarneq pillugu Inatsisartut inatsisaanni nr. 18, 31. oktober 1996-imeersumi ilaatigut Inatsisartut inatsisaatigut nr. 17, 3. december 2009-mi allanngortinneqartukut kingullerpaamillu Inatsisartut inatsisaatigut nr. 5, 4. juni 2012-imi allanngortinneqarsimasumi tulluuttunik allannguisoqarpoq:

1. § 14, *imm.* 5-10 atorunnaarsinneqassapput.

2. § 14-*ip* kingornatigut ikkunneqassaaq:

”§ 14 a. Naalakkersuisut sinerissamut qanittumi aalisarnermut aalisarsinnaanermut akuersissutinik tunniussinerminni aamma akuersissuteqarnerminni akiliummik akileeqquisarnissaq pillugu aalajangersagaliorsinnaapput. Akiliulli taanna sinerissamut qanittumi raajarniarluni aalisarnermut aalisarsinnaanermut akuersissutinut aamma akuersissutiginninnernut akileqquneqartassanngilaq, tamatumunngami *imm.* 2 naapertorlugu akiliummik akiliisoqartarmat.

Imm. 2. Naalakkersuisut aalajangersagaliorsinnaapput ukiumoortumik akiliummit akiliuteqartarnissaq pillugu ingerlatseqatigiiffinnit inunnillu avataasiorluni aalisarnermut imaluunniit sinerissamut qanittumi raajarniarluni aalisarnermut akuersissuteqarfigineqarsimasunit pisassiissutinillu tunineqarsimasunit.

Imm. 3. Naalakkersuisut akiliummik akiliisarneq pillugu *imm.* 1 aamma 2 naapertorlugit allaffissornikkut ingerlatsineq pillugu sukumiinerusunik aalajangersagaliorsinnaapput, taakkua ilagalugu akiliutininut akitsuullit aalisarneq pillugu inatsit naapertorlugu akuersissummik akuersissuteqarnermilluunniit nutaamik pissarsinnaasanngitsut, aningaasat akiitsorilersimasat, pillaatitut ernialiussat, akileqqaarsimatinnagit.

Imm. 4. Akiliutininik akiliinngitsoortoqartillugu, Inatsisartut inatsisaat manna naapertorlugu aalajangersarneqarsimasumik, erniat pillugit inatsimmi ullup akileereerfusussap kingorna naatsorsorneqartartuni aalajangersakkat naapertorlugit ernialersuisoqartassaaq. Ernialiussalli annertussuseqassapput ikinnerpaamik 50 kroninik naatsorsorneqartassallutillu kingusinnerpaamik ullormit piffissaagallartillugu akiliuteqarfiusartussamit.”

3. § 33 imm. 4 kingorna ikkunneqassaaq:

“Imm. 5. Akiliisitsinerit, imm. 1-4-lu naapertorlugit akiliisitsissutaasartut, Nunatta Karsianut nakkartassapput.”

§ 2

Inatsisartut inatsisaat ulloq 1. januar 2013 atortuulerpoq.

Namminersorlutik Oqartussat, ulloq 3. december 2012

Kuupik Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut